

宋詩鈔補

一
玉
八
冊
玉

止齋集補鈔

陳傅良字君舉溫州瑞安人乾道八年進士寧宗朝累遷中書舍人除寶謨閣待制卒諡文節有止齋集

癸丑冬車駕過宮留相還朝

一聲警蹕接天齊。馳道無塵馬不嘶。月御順行隨日轂。乾端和氣布坤倪。三槐相繼歸公袞。細柳還須聽將聲。老矣尙能歌二聖。不應專美在涪溪。

冬夕書懷

冬夜苦難曉。短景復易夕。安得戶牖光。不待東方白。恍如遊化城。瓊臺若干尺。英華發林藪。餘彩散阡陌。平鋪浩無垠。巽入微有隙。忍寒貪縱觀。未願明曦赫。柳綿著歌茵。梅片隨粧額。嶢然羣汚中。有意欲比迹。自識玉皇家。癯仙陋山澤。新來學爲農。遭

歲屢無麥。穉子色恆飢。老婢脚盡赤。一鉢今有待。喜更問瓜場。歸來看牀頭。瓶粟幸餘積。且以炊春醪。號召已散客。

張冠卿以前詩懷哉各努力。人物古來少之句爲十詩見。

寄次韻奉酬

明月不可沈。有時障氛霾。芙蕖生淤泥。豈必所處佳。老子苦鍊藏。釋氏多遣排。如欲盡物累。自古誰好懷。

冥心觀宇宙。孰是同與各。夜旦無息期。日出星河落。此有齊人瑟。彼有荆人璞。嗟余耳目短。豈故重然諾。

朝雞警冠劍。巷犬吠村塢。胡然子列子。越在鄭東甫。永懷王黍離。莫與成申許。雞犬各有役。人亦宜自努。

江梅歲已過。燕子春又來。不愁吾鬢霜。所恨此志灰。扶桑燁燁明。閭闔蕩蕩開。欲往豈不可。致遠非駑駘。

遊白石巖

地向東南傾。石際滄海立。蛟鼉限波濤。雞犬得城邑。居然通國望。跋莫他山及。道人獨有之。置屋三四級。幾看星月爛。却聽風雨急。于今二百年。我共冥鴻集。晤語夕陽低。對酒秋旻溼。明朝江上舟。避雨漁翁笠。邂逅一俛仰。此道可於邑。

送葉正則赴浙西憲幕

頻年送行客。酒罄詩不工。最晚與君別。念此百感叢。岐山有鳴鳳。雅頌移幽風。于時二老生。出處海上同。曹劉對七箸。失色一語中。明朝蜀江水。不與灞澹通。人心起毫末。世故開鴻蒙。乃知貧賤交。不下王霸功。霜根宿病驥。雲帆背蜚鴻。秋水能隔人。白蘋况連空。相從自束髮。各去隨轉蓬。今懷欣有合。後會苦未重。鱸魚直萬錢。羊酪醅一鍾。願君養盛年。我友半已翁。

借書一首別薛子長

山阿着柴扉。陋甚誰盤桓。美人此何來。鉅竹數十竿。日閱書百篇。尙覺目力寬。欲從我借書。我書何足觀。午勤抱道經。及此鬢髮斑。一語未領會。累日不自安。雖更聖人手。亦恐衆說漫。况復秦漢下。曾莫脩與刪。致之獲麟前。存者今若干。我無所取裁。望洋久空歎。讀書固匪易。窮理良獨難。昨來荷堤上。嘗試及孟韓。此語如涓埃。此道如丘山。

張漕行部遇湘岸有作因次其韻

春晚得新霽。草木日夜綠。陽光初蔽虧。野暝或單復。美人浮湘波。領此入蓬屋。故放歸帆遲。更呼漁火續。窮探物精華。盡付詩凡目。憶昨欣晤對。令我忘休沐。劇談酒行希。危坐兵衛肅。相思正倚樓。所寄忽累幅。瑰辭堪買貧。軼韻和難屬。自從楚驛興。悲

些逮差玉。後來數唐人。疑乃巖隈宿。世無梁昭明。斯文又誰錄。

送郭希呂

我門閉重重。我徑阻且深。梅花獨相依。聊以慰我心。美人從何來。崎嶇自幽尋。亦于琢冰中。而和南風琴。榮甲尚可羹。新篳足同斟。不知歲已華。歸興生霜砧。欲別復少住。棲鳥啼月林。客去鳥翻飛。落花滿牆陰。

上閩師梁公生日二十二韻

炎正維中葉。皇圖再造年。天潢流少海。星緯聚台躔。臣主嘗難並。乾坤豈偶然。千齡開曆數。一氣付陶甄。黃屋傳神器。彤庭領衆仙。風雲從此會。日月更誰先。昔者求侵地。何人賦甫田。吳兒咸抵掌。噲等欲差肩。廟論惟多士。戎功不在邊。一麾分赤社。萬事屬青編。吾道誠難用。諸儒亦自偏。才名多獲落。經行失拘攣。

洛蜀何嗟及。熙豐竟禍延。旁羅兼雁木。平步忽貂蟬。甚矣知當
宁。淒其望濟川。年來羣老行。公在萬民懸。定作鹽梅夢。行歌杖
杜還。滄溟宗衆濫。衡嶽倚蒼玄。要使垂身後。無爲慰眼前。管絃
無算爵。桃李未央天。曾燕雖堪頌。閩山不足鐫。中原康濟事。彝
鼎願聯翩。

送趙叔靜教授閩中四首

家無宿春糧。適意恣所向。征鞍催上官。帆海看疊嶂。有言及當
代。浩飲益悲壯。以茲賓周行。盍在幾人上。

其二

讀書須讀經。學文須學古。青衫故不換。白髮早可數。我亦窶人
子。風雨蔽蓬戶。胡爲數相過。夜話恆過午。

其三

炯炯出萬壑。冰壺懸清秋。孰與玉瓚中。穆然養黃流。孤松高半天。蘭芷復過幽。看君最雍容。奈何短自謀。

其四

百吏不可試。卷懷州校官。翩然落南閩。不爲荔子丹。雕蟲妙經術。倚市多儒冠。吾道未必貴。政此良已難。

簡友人一首

南去有五嶺。北來有重湖。水清石益奇。往往中州無。在昔宦遊者。越若韓張徒。胡然自衡陽。隻雁亦不徂。

和張倅唐英咏梅

種梅欲百畝。垂老意未渝。有山在堂背。有溪在庭除。我危坐中央。花以賓坐隅。人固不可親。花亦不可疎。

其二

花芳以養性。花蔭以休影。更欲從旁謀。種秫可半頃。衝寒時一觴。我醉花獨醒。醉醒兩相忘。久矣繫歸艇。

春晚書懷二首奉簡陳益之

百舌喜太甚。杜鵑恨何深。睨睨斯黃鸝。律中宮之音。物情自不齊。天運初無心。道人獨領會。杖藜立芳陰。

其二

百卉得雨露。華滋巧相娛。但知說姚魏。河洛竟何如。我方悟吾生。箋經未成書。安得小學師。從之注虫魚。

送沈元誠赴臨漳主簿

誰說鄉先進。能無沈隱侯。青衫今適越。白髮竟依劉。道固爲名累。人當與命謀。三台行漸近。且勿問歸舟。

和段仲衡譙樓新軍額

筆落元戎重。詩成坐客新。譙門雙壯觀。邊將一團春。夢破盤行玉。名存甕得銀。衰遲亡補報。着意與民親。

其二

寒消晴後雪。光轉凍前風。歲已宜麻麥。人猶厭芥菘。樓頭千里望。筆勢萬夫雄。及此吾何力。天低露草豐。

送丁懷忠教授象州

二老羈旅久。一飮瘴鄉輕。把酒時相屬。令人意自平。校官無簿領。帥閫甚聲名。所恨冥冥雨。梅天不肯明。

東陽杜季高遠訪詩以送之

當世關衰壯。斯文視合離。強餐吾豈敢。後會子何期。村落秋彌好。溪山晚最宜。逢人相問訊。所欠更能詩。

送周介之同年赴德化宰

民社須吾黨。江湖足此情。不堪秋暑近。欲趁暮潮平。拙宦成華髮。憂時自短檠。君看廬阜石。千載尙垂名。

挽新昌呂修職

頃作庵廬客。看公手種蒔。溪毛無亂理。宰木有連枝。久欲鑿他石。今還賦此詩。黯然懷宿昔。絮酒定何時。

送同年林多益丞海寧

同里衣冠近闊疎。同年齒髮多衰變。美人宜在玉笋班。隱吏亦隨花雨縣。有杭一葦逢迎可。每食雙魚甘旨便。顧瞻周道竟何如。善爲身謀吾豈願。清廟笙鏞濟濟陳。碧梧鸞鵠深深見。由來盛事歲月晚。誰到修途肝膽健。楊花吹水酒搖波。一請加餐再無倦。

送郡守汪充之移治嚴陵

挂梁龍骨經時蟄。井井黃雲秋已及。十日不雨民未急。使君日
膳長蔬滑。澄空颯颯雲霧入。饁婦休眠兒覓笠。村春化出雲子
粒。市上明朝升二十。農家語圃商語賈。恆願使君無疾苦。自今
一飮吾腹果。健看將母從簫鼓。馮翊扶風天尺五。見說嚴陵在
何所。詔書奪去萬舌吐。九重欲叩君門阻。棲鳥護巢駒戀阜。東
人自視西人好。那知湛露溥秋草。春意平鋪無剩少。有客解事
翻然笑。元祐治平諸故老。身要人扶功未了。誰知青絲絡馬橫
門道。應笑江湖華髮早。

次德修仙巖韻

我家仙巖人跡稀。客從何來此何時。岷山之陽適海嶠。萬里欲
寫心精微。瀑泉自雨一丘壑。有龍蟄不隨羣飛。病樵弛擔渴猿
喜。雖未作霖良已奇。吾聞岷山天與齊。仰止不見如調飢。君登

絕頂小天下。此縱有山安足嬉。翩然肯過非所期。此道遼闊車誰脂。願言稅駕毋遄歸。爲我更賦崧高詩。

赴桂陽道中喜晴書事

十日九雨垂垂雪。馬僵僕病泥乘橇。披衣闖戶得星月。耳根久與朝雞別。熟睡八年謀未拙。乞米作糜蒙被啜。客來午漏家僮出。如今兒噉妻愁絕。我縱喜晴心已折。可以藝麻多笋蕨。苟有一丘吾計決。奈何諸公廝役皆豪傑。尙愛春陵老元結。

牡丹和潘養大韻

看花喜極翻愁人。京洛久矣爲胡塵。還知姚魏輩何在。但有歐蔡名不泯。夕陽爲我作初霽。佳節過此無多春。更燒銀燭飲花下。五陵佳氣今方新。

覓樹栽

覓得循除數畝園。衰遲無力正乾坤。學爲老圃徒幽意。富比封君亦浪言。計日若將栽樹木。成陰當待長兒孫。出門悵望春連塢。爲向雲屯斲一根。

汪守三以詩來次韻酬之

一年春事墜槐宮。却愛清和與政通。乳燕黃鸝相倡和。落花脩竹亂青紅。羨君有賦非占鵬。愧我無才可送窮。細與論文一樽酒。他時還憶慕江東。

湖樓送客卽事一首奉懷益之兼簡同餞諸友

誰家喧騎盍朋簪。屋壓城頭水照簷。橘柚兩山香盡處。蒲荷十里淨相兼。愁將久雨春無賴。別在明朝酒未厭。甚欲去同三四友。鱸風更捲一江簾。

和丁端叔歲曉書懷韻

來涂藍縷雪埋人。三百于今又六旬。奏課定應書下下。班春聊復喜津津。餘蔬被壤農亡恙。茂草連扉盜自新。曳杖鹿頭時極目。炊煙齊起兩州民。

丁端叔送海錯以詩來用韻酬之

澤魚山豕各忘年。味可勝窮總所便。堪笑荆梧相俎豆。遂令蠻觸自矛鋌。食無誤蟹車同軌。貢不徵蚶澤漏泉。我在窮山人迹罕。亦蒙惟錯饋甘鮮。

戊申臘桂陽喜雪

月不能明雨却稀。山容野色夜輝輝。清霄下際雙瓊闕。仙仗前驅萬玉妃。亘古嶺旁冬不到。從今湖外歲無飢。來年此日吾何適。簑笠寒江一釣磯。

衡守劉子澄以詩來和韻奉酬

曳裾朝路不同時。謀食衡湘亦把麾。一見相忘光可鑑。十年何在怒如飢。力堪扶世將誰可。語不驚人或自危。夜雪埋山江欲凍。依然春信在南枝。

遊南嶽

天作之山曷爲哉。遙知閭闔正南開。兩川文武長江下。百粵車書五嶺來。柴望久爲周墜典。牢愁多見楚遺才。不知崧岱還何似。我欲將書寄雁回。

登祝融峯喜霽

仰止扶藜鬢髮蒼。恰當風雨暗三湘。爲誰一闢天無際。及我重來日未央。江過數州多曲折。山緣長畝半青黃。老僧耐得從頭問。問到吳門竟渺茫。

和沈帥持要張漕季長韻

欲杭一葦近聲光。恨不先期燕子涼。舊學甘盤聊此日。倦遊司馬尙他鄉。別從滄海山橫斗。來自岷峨水濫觴。不謂偶成三楚客。得爲蘭杜附諸香。

送沈帥

甘盤夢不入高宗。四皓誰知去所終。傳野有人能論學。漢庭無事可言功。行藏于此皆成趣。談笑從今得退公。分付諸兒理民社。宜休堂上聽松風。

送范東叔歸帥潼川

楚山黃落洞庭波。背却雞人問釣蓑。歸思甚于三峽壯。才名空自十年多。曩遊記得青燈在。後會愁如白髮何。我更有懷言不盡。聊將短韻代長歌。

登祝融峯觀日出